



**H**ieronymus ex antiqua & nobili familia Buislandianorum apud Belgas natus & educatus est. Erat is felici indole conspicuus. itaque Louaniij operam literis dedit, & mediocrem earum cognitionem adeptus fuit. Fuit insuper uitæ integritate & morum innocētia omnibus notus. hinc factum ut Ariensis præpositus eligeretur, atque in regum Hispaniæ (qui apud Belgas præerāt) consilium ad optaretur. Habebat Hieronymus fratrem Franciscum Archiepiscopum Vefontinum, à quo etiam multis sacerdotijs & beneficijs ornabatur. Vnde cum multarum opum accessione diuissimus esset, omnia sua bona ad literarum studia conuertit, atq;

Erasmi Roterodami consilio, cuius familiaritate utebatur, Louaniij trium linguarum, Græcæ, Latinæ, & Hebraicæ magnificum Collegium instituit, & earum professoribus liberalia stipendia ordinauit. Itaque Hieronymus sua liberalitate effecit, ut doctissima ingenia apud Belgas excitarentur. Vnde etiam omnes, quibus bonæ literæ cordi sunt, hunc unicum studiorum patronum, pro sua quisque portione, sint immortalitati commendaturi. Cum hoc modo bonis literis promouendis operam dedisset, anno post reparatam salutem circiter millesimum quingentesimum decimum octauum obiit, & honorificè sepultus fuit. Huic Erasmus Græcum & Latinum Epitaphium composuit, quod subijcere placuit,